



Bosnia and Herzegovina
Federation of Bosnia and Herzegovina

CANTON SARAJEVO
Ministry for Education

Broj: 11-04-34-49840-63/25
Sarajevo, 4.11.2025. godine

SKUPŠTINA KANTONA SARAJEVO
n/r Elvedina Okerića, predsjedavajući Skupštine Kantona Sarajevo
-ovdje-

PREDMET: Zastupnička inicijativa, odgovor, dostavlja se;

Zastupnica Marijela Hašimbegović je u okviru 25. radne sjednice Skupštine Kantona Sarajevo uputila sljedeću zastupničku inicijativu:

„Ovom inicijativom upućujem zahtjev za hitno iznalaženje rješenja radi realizacije Škole plivanja za učenike četvrtih razreda osnovnih škola u Kantonu Sarajevo. Podsjećam da je Škola plivanja obavezan sadržaj Nastavnog plana i programa, te je njena realizacija zakonska obaveza. Nastavna godina je započela 1. septembra, a obavezna realizacija Škole plivanja do danas nije pokrenuta. Svako neispunjenje propisanog nastavnog plana i programa predstavlja kršenje zakonskih obaveza i službenih ovlasti. Nadalje, kontinuirano odgađanje realizacije obaveznog obrazovnog sadržaja grubo narušava dječija prava koja su jasno definisana međunarodnim konvencijama. Zahtijevam da hitno poduzmete sve neophodne mjere u cilju pokretanja i realizacije Škole plivanja.“

ODGOVOR

Škola plivanja za učenike 4. razreda osnovne škole je u okviru predmetnog kurikuluma za 4. razred propisana kao specifičan oblik nastave iz nastavnog predmeta Tjelesni i zdravstveni odgoj, kao i Pravilnikom o realizaciji škole u prirodi, izleta, studijskih posjeta, ekskurzija, kampovanja/logorovanja, društveno-korisnog učenja i drugih oblika odgojno-obrazovnog rada u osnovnoj i srednjoj školi („Službene novine Kantona Sarajevo“, br. 34/24 i 31/25).

Kako bismo unaprijedili organizaciju i realizaciju Škole plivanja i Škole skijanja, Ministarstvo za odgoj i obrazovanje (u dalje tekstu: Ministarstvo) je pristupilo donošenju izmjena i dopuna Pravilnika o realizaciji škole u prirodi, izleta, studijskih posjeta, ekskurzija, kampovanja/logorovanja, društveno-korisnog učenja i drugih oblika odgojno-obrazovnog rada u osnovnoj i srednjoj školi, na način da je JU Institut za razvoj preduniverzitetskog obrazovanja direktno uključen u realizaciju, koordinaciju i praćenje ovih procesa.

Također, propisano je da se u budžetu Kantona Sarajevo osiguravaju sredstva za realizaciju Škole plivanja i Škole skijanja.

Iz naprijed navedenog je jasno da je Ministarstvo opredijeljeno, ne samo za realizaciju Škole plivanja, nego i kontinuirano unapređenje ovog procesa.

Koristimo se prilikom da Vas informišemo da se radi o kompleksnom procesu, koji uključuje više direktnih sudionika, a ne samo Ministarstvo.

Dakle, općine na području Kantona Sarajevo, su pored Ministarstva direktni implementatori i učesnici u ovom procesu.

Ministarstvo je sa Općinom Vogošća potpisalo Sporazum o realizaciji Škole plivanja za učenike 4. razreda javnih i privatnih osnovnih škola na području Općine Vogošća za školsku 2025/2026. godinu, kojim je regulisano pitanje sufinansiranja Škole plivanja za učenike iz osnovnih škola sa područja Općine Vogošća, čime su se stekli uslovi da učenici sa područja ove općine počnu sa realizacijom Škole plivanja na bazenu na području Općine Vogošća (WOG centar).

Po istom modelu će se realizovati i Škola plivanja za učenike iz osnovnih škola sa područja Općine Ilijaš, na bazenu na području Općine Vogošća (WOG centar).

U toku su završne aktivnosti na postizanju dogovora i potpisivanju sporazuma o saradnji i sa Općinom Novo Sarajevo.

Posebno ističemo činjenicu da se do ove školske godine, za učenike iz svih općina, osim Općine Vogošća i Općine Ilijaš, Škola plivanja realizovala na olimpijskom bazenu Otoka, ali JP „Olimpijski bazen Otoka“ je ove godine ponudio cijenu po učeniku koja je bila neprihvatljiva, odnosno uvećana u odnosu na prethodnu školsku godinu gotovo 100%, što je za Ministarstvo bilo neprihvatljivo.

Pošto nismo uspjeli postići adekvatan dogovor o realnoj, ali i ekonomskoj cijeni, sa JP Olimpijski bazen Otoka, Ministarstvo je postiglo dogovor sa Fakultetom sporta i tjelesnog odgoja UNSA, odnosno dogovorena je razumna i prihvatljiva cijena po učeniku, te će se Škola plivanja realizovati na navedenom fakultetu.

JU Institut za razvoj preduniverzitetskog obrazovanja je uradio plan realizacije Škole plivanja za sve osnovne škole u svim općinama, osim Općine Vogošća i Općine Ilijaš, te će Škola plivanja početi sa realizacijom u 2.polugodištu u školskoj 2025/2026. godini.

Naglašavamo da se i dalje suočavamo sa izazovima, jer smo na stanovištu da jedan bazen nije dovoljan za realizaciju Škole plivanja za sve učenike 4. razreda, te i dalje aktivno radimo na pronalaženju optimalnog rješenja, odnosno realizaciji Škole plivanja na još jednom bazenu na području Kantona Sarajevo.

S poštovanjem,

Dostaviti:

1. Naslovu
2. a/a

